

28. grudnia2016 r

Jakech już wczorej spōminōł wartko fyrťo ku nōm Zilwester i Nowy rok a zatym cōłki karnewal. Terōzki to już można mynij ale kejsik, jak jōch bōł jesce ło te dwadzieścia kilo modszy, zawdy przy Zolwestrze (nō i we cōłkim karnewalu, faszingu) musowo trz bōło mieć luftbalōng.

Luftbalōngi, luftbalōngi... Tyn zwyk to już u nōs dosik dōwnō chyciōł i wszandy szło kejsik ujzdrzić roztolicznych machlyrzy, handlyrzy, kerzy mieli ci je na takim dugim, rubym kiju ze dupnym kartoflym, we kerym byli powstyrkane te roztomajte luftbalōngi. A to roztomajtō gadzina, a to bōnte fresy ze srogimi kicholami i take tam jesce. I bōło ci to jakesik kielanōście łoť, iże przitrefiōło mi sie coch szōł ze mojōm Elzōm bez Wolka a sam styrcy ci na winklu jedyn mōj dyrechtōr ze takōm lagōm i luftbalōngami na nij.

Ludzie! Nōjprzodzij żech myślōł, co mi sie cosik na ślypia ciepło (bo razinku tyn dyrechtōr to bōł na isto srogi angyjber i srogachny ku tymu klugszajser).

Nale niy, to bōł łoń i tela. Nō, tōż żech symnōł mōj hut (jescech wtynczōs zawdy miōł na palicy hut), gryfniech sie pokłōniōł i prziliźnie sie go pytōm:

– Pochwōlōny pōnie dyrechtorze. A cōż to, pōn dyrechtōr tyż kcōm do swojigo geltaku przidubnōńć? Toć, jō wiym, jō gynał miarkuja, iże we werku knap je ze złociokōma, ale coby aże tak źle już ze panoczkiym bōło?

– Niy, niy panie Ojgyn, to niy tak! – pado mi na to dyrechtōr i fresa skukōł za cajtōngiym, coby go fto niy poznōł. – Wiycie, panie Ojgyn kciōłech mojjij staryj sprawić taki luftbalōng, ale tyn handlyrz niy miōł drobnych. Dōłech mu dwiesta złotych i łoń poszōł je zmiynić do szynku a mie sam wtyknōł tyn dyszel ze tymi balōngami. Tela, co go już niy ma cheba ze dwie godziny. Jezderkusie! Takō gańba! Co tyż ludzie, kerzy mie sam ujzdrzili pedzōm jutro we werku?

Jōch tak wartko porachowōł tyn rest luftbalōngōw i wylazło mi, iże tyn handlyrz mojigo dyrechtora niy ło cyganiōł, blank ci go niy drzistnōł, bo tych balōngōw bōło gynał za dwiesta złotych. Łōń ino uwidziōł dufnygo gupieloka i frica, tōż tyż mu wtyknōł hurtym wszyjsko, co jesce miōł do skalyniō, a iże miōł taki fart, co sie pozbōł wszyjskich ło rōż, to mu jesce na lepsze ło stawioł ta kryja ze tym kartoflym.

Tōż miarkujecie, moje Wy roztomiylē suchōcze, iże zawdy trza dōwać stopierōńsko pozōr, bo nigdy niy wieda kej sie trefi na jakigosik machlyrza i chachmynta... tym barzij przy roztomajtych fajerach!